

Rapport annual 2021



Festa d'inauguraziun 22 october 1961



Stadi davo la sanaziun 2012/2014

Introducziun

Gnanca duos ons davo nos president d'onur es morta in avuost 2021 eir sia duonna Erica Parli. Davo ün ferm hom sta pel plü eir üna ferma duonna, manzuna Rico illa cronica 50 ons Scoula da Pauris Lavin. Erica ha prestà servezzans instancabels gratuitamaing decennis a la lunga sco secretaria per la società. A la chara trapassada vulain exprimer eir amo davopro ün cordial ingrazchamaint per tuot quai ch'ella ha fat per nus e tgnain ad ella in buna memoria.

In preschentscha da numerusa prominenz chantunala e regiunala ha dat Rico Parli, als 22 october 1961, il bivgnaint ad üna gronda raspada festiva. Il seis pled orientescha el in nom da l'architect Valentin Pitschen, Sent, davart l'andamaint da la fabrica da la chasa Fliana. Tanter oter manzuna el cha la scoula da pauris haja cumprà d'Albert Waldburger stalla e tablà da quista chasa. Siond cha la scoula pudaiva gnir dovrada be d'ürant il temp d'inviern, esa stat da provar da nüzziar il stabilimaint eir d'ürant la stà, quai cun fittar quel temp la chasa a colonias sco dmura da vacanzas. I gnit calculà cha la scoula vegna frequentada da ca. 40 partecipantas e partecipants. La quadratura dal tablà d'eira bundant 60 m², uschè cha quai es stat la dimensiun giavüschada per quist nomer da scolars. Bainbod s'haja stuvü constatar cha la sala illa Fliana saja massa pitschna, usche cha la radunanza generala ha decis dal 1979 d'ingrondir la sala existenta per 54 m². Il nomer da las partecipantas e dals partecipants es crechü continuadamaing fin sün 198 duonnas e singuls homens. Dal 1999 es gnü festagià 40 ons chasa Fliana Lavin e l'ingrondimaint da la sala. In quell'ocasiun han 150 duonnas scrit üna cortulina cun üna poesia fatta d'Annina Roner, Scuol, per Rico sco iniziand, fundatur e president da la Fliana (vair agiunta). Davo 44 ons d'actività sco president ha Rico Parli surdat la fin da l'on 1999 la bachetta ad Ulrica Guidon, Zernez, la quala ha manà la società fin l'on 2007. In seis temp d'uffizi ha ella adattà il nom da la società sün "Lö d'inscunter Chasa Fliana Lavin". La sanaziun da la chasa Fliana, realisada d'ürant ils ons 2012/14 da Dumeng Duschletta, Zernez, chi ha presidià la società fin l'on 2016, cur ch'el ha surdat la carica al suotsegnà. Per simplifichar l'administraziun e per chattar plü facil personas

chi surpiglian üna carica da manar la società, s'haja separà l'on 2019 l'administraziun da la chasa cun constituir üna fundaziun chi maina la gestiun da tala. Als 27 marz 2019 ha decis la radunanza unanimesa da constituir üna fundaziun tenor art. 60ff.CSS cun las meras da promover la vita culturala in Engiadina e Val Müstair, da sustegner activitats sco cuors, referats etc. chi's drizzan a tuot la populaziun e chi promovun ils contacts socials ed il sustegn d'activitats fisicas e psichicas e la promoziun da spüertas da scolaziun supplementara, pustüt per persunas chi lavuran in l'agricultura. Priorità d'essan però avair las activitats da la Società Lö d'inscunter Chasa Fliana.

Survista activitats

Las entradas cun fittar la Chasa Fliana sun chaladas in congual cun l'on avant ligermaing. Causa la pandemia da corona vaina stuvü registrar diversas desdittas da contrats da fittanza. Singulas organisaziuns han però pajà voluntariamaing l'import per pudair sgürar la piazza in chasa l'on chi vain. Als 22 avuost ha nossa manadra gnü ün accidaint ed ha stuvü avair per part agüd pel custodi da la chasa. La sgüranza AXA ha bunifichà talas spaisas generusamaing.

Als 15 avrigl ha il cussagl da fundaziun relaschà ün reglamaint davart l'organisaziun e davart las incumbenzas dal secretariat. Cun charta dals 16 avuost ha la surviglianza chantunala da las fundaziuns tut cugnuschentscha dal reglamaint sainza far remarchas.

Da Madlaina Zedler-Parli vain nus pudü tour incunter üna gronda quantità da documainta da la Fliana, la quala as rechattaiva in chasa da seis genituors. Nus eschan ourdvar cuntaints da pudair depositar tala aint il archiv cumünal dal cumün da Zernez.

Causa cha'l dovair da la firma Jörg Luzi GmbH da Zernez da far la reparatura vi da la pensa dal tet sco lavur da garanzia d'eira scrodà, vaina preferi da surdar l'incumbenza a l'impressari Holzbau Foffa Conrad, Zernez, il qual ha realisà la reparatura in settember 2021.

Las fracziuns Lavin, Guarda ed Ardez dals cumüns da Zernez e Scuol fan part a l'organisaziun internaziunala "Bergsteiger Dörfer". La filosofia da l'organisaziun es tanter oter il mantegniment da la cultura e da las valurs natüralas. Il büro Turissem Engiadina Scuol Val Müstair SA fa la coordinaziun regiunala ed els salüdessan, scha la Chasa Fliana fess eir part a l'organisaziun. In divers inscunters han els preschantà il concept ed els spettan sün nossa decisiun.

Cun l'introducziun da la carta da giasts per tuot il cumün da Zernez vain eir il sistem d'annunzcha da las pernottaziuns adattà. A partir dals 1. schner 2022 fuorma tal sistem eir la basa per far giò quint cun las taxas da cura. Quai ha per consequenza, cha'l process administrativ vain spostà e l'implir oura las cedlas d'annunzcha scrouda. La registraziun digitala dals giasts fuorma la basa per la taxa da cura ed eir per la carta da giasts. In avegnir farà noss'administradura quist'annunzcha insembel cun nos secretariat. Nus vain spranza, ch'in avegnir as possa evitar malinclettas e sbagls chi sun capitats fin uossa cun far giò quint.

Finanzas

Il quint da gestiun preschantà dal büro Accontaris AG, Scuol, serra cun ün pitschen guadogn da CHF 2'338.40. Il chapital da fundaziun s'augmanta per tal import sün CHF 287'185.95. L'immobiglia es amortisada sün CHF 173'900 (stima uffiziala 2015, CHF 560'600), quai davo cha nus vain investi be per l'ultima renovaziun raduond CHF 765'000.

Sguard in l'avegnir

Actualmaing as concentrescha il cussagl vi dal mantegniment da la Chasa Fliana. I sarà da far cuntinuadamaing lavuors da reparatura.

Remarchas finalas

In nom dal cussagl da fundaziun ingrazch eu fich a nossa manadra da chasa, Anna Margaritta Filli. Seis ingaschamaint instancabel a favur da la Fliana es exemplaric. Ün sincer ingrazchamaint eir a Martina Rest dal büro Rest-Administraziuns SA, Susch, chi'ns da grond sustegna in nossa lavur. Grazcha fich ad Annastasia Parli ed a Gion Peider Mischol per la buna collavuraziun aint il cussagl, ad Andrea Zogg cun sia squadra dal büro Accontaris Treuhand AG per manar la contabilità e per far la revisiun da quint, sco eir a tuottas persunas chi praistan in che möd chi saja lavur a bön da la Fliana.

Avrigl 2022, Jachen Erni, president